

唐
文
拾
遺

唐文拾遺卷之四十二

榮祿大夫三品頂戴前分巡廣東高廉道加四級臣陸心源輯

崔致遠 九

初投獻太尉啟

某啟伏以嶽之高與海之深物所歸而人所仰迥拔
千仞平吞百川其如巖崿擎天波瀾蘸日豁四方之
眼醒萬族之魂是宇內之所歌謠匪毫端之能贊詠
伏惟司徒相公獨抱神略一匡聖朝譽洽於良哉康
哉名標於可久可大龔黃德政則郡民有遺愛之碑
韓白功勳則國史有直書之筆況某劣同窺豹淺比

傾螺難將篆刻之詞輒頌陶鎔之業但以間生賢哲
年當五百之期廣集英豪客滿三千之數旣納之似
水則來者如雲斯乃司徒相公鏡於心而寬兮綽兮
粹於事而無偏無黨網羅儒彥籠罩驍雄於儒則沈
謝呈才於武則關張效力遂使弓旌招隱士巖谷爲
之一空介冑降叛夫煙塵爲之四息豈獨分憂於閭
外實惟稱慶於寰中莫不信齊於春夏秋冬恩播於
東西南北但日月照臨之所是風雷變化之時然則
尼父堂中亦有他鄉之子盍嘗門下寧無遠地之人
片善可稱前賢不讓永能執大邦之政豈欲遺小國

之賓是以敢寫微衷輕投朗鑒某新羅人也身也賤
性也愚才不雄學不贍雖形骸則鄙年齒未衰自十
二則別雞林至二十得遷鸞谷方接青襟之侶旋從
黃綬之官旣忝登龍敢言絆驥今者乍離一尉欲應
三篇更願進修且謀退縮獨依林藪再閱丘墳課日
攻詩虞訥之詆訶無避積年著賦陸機之哂咲何慙
俟其敦闋致功琢磨成器求魚道在垂竿而不挂曲
鈎射鵠心專撚筭而冀銜後鏃端操勁節伫望良時
竊見萬物投誠八紘嚮德不謁相公賓閣不遊相公
德門者詞人之所懷慙羣議之所發誚某固敢隳肝

瀝膽進牘抽毫不避嚴誅輒申素懇謹錄所業雜篇
章五軸兼陳情七言長句詩一百篇齋牀上獻冒犯
尊威不任戰懼之至謹啟

再獻啟

某啟某今月五日謹以所學篇章五通貢於賓次雖
慙獻豕輒覬攀龍脩客路以心摧望仁風以目斷乍
覩秦雲之態或似美人細看燕石之姿恐爲棄物伏
蒙司徒相公光逾愛日煦及寒灰念以遠別海隅久
沉江徼特垂豐餽俾濟朝饑自驚樗櫟之材已荷稭
梁之惠雖龜魚投水驟喜命蘇而蚤蝨負山深憂力

敗且某也。兔絲雖絡蛛網，自營萬計，尋思不如學也。百年勤苦，猶恐失之，所以未競宦塗，但遵儒道，筮仕而懶趨塵土，卜居而貪意林泉。人間之要路，通津眼無開處；物外之青山，綠水夢有歸時。所願更淬鋤刀，終求鐵印，斂跡而跼藏，學戴安身而跌宕。詞林嘗誦古詩，還符此意云：志士惜日短，愁人知夜長。某旣懷志士之勤，又抱愁人之苦，聊憑毫牘，敢述肺肝。且如踠壁冥搜，杜門寂坐，席冷而牕風擺雪，筆乾而硯水成冰。欲爲尼父之絕編，無奈羲和之促轡，卽可知指萬卷之經史，恨三冬之景光。及其凍枕傷神，孤燈伴

影寒漏則滴殘別淚遙碁則搗破羈心空勞甯戚之
悲歌莫繼陸機之安寢亦可想貯千端之鬱邑過五
夜之寂寥然則志士之勤也旣如彼愁人之苦也又
如此況某家遙日域路隔天池投客舍而方甚死讎
指何門而欲安生計唯慮道之將廢豈言人不易知
不敢以陋質凡姿覲相公清嚴之德不敢以片言隻
字希相公採錄之恩所望者或以其萬里地遠來十
餘年苦學稍垂惻憫得濟困窮則必堅背水之心終
爲勇士決移山之志不讓愚公伏以某譯殊方之語
言學聖代之章句舞熊則難爲短袖辯詞則未比長

裾舌無三寸之能空緘壯氣腸有九回之懇但戀深
恩干浼尊嚴下情無任感戴兢惶涕泗之至謹啓

謝生料狀

某啓某昨日伏蒙仁慈再賜生料恩垂望外喜集愁
中安貧而已瞻晨炊感德而惟知宿飽遂使范家釜
甑免恨長閑顏巷簞瓢倍加其樂伏以某雖楊曾穿
葉而蓬且斷根空把利錐冀遇大賢之鑑豈將長缺
先興下客之歌一昨輒貢蕪音累塵尊聽窺德宇而
燕雖相賀望威風而鷁恐退飛豈料司空相公俯念
海人久爲塵吏特垂記錄繼賜沾濡生前之溝壑無

虞饑寒雖濟頭上之邱山漸重負戴難勝依投而既
類窮猿展效而願同病雀下情無任云云

獻詩啓

某啓某竊覽同年顧雲校書獻相公長啓一首短歌
十篇學派則鯨噴海濤詞鋒則劍倚雲漢備爲贊頌
永可流傳如某者跡自外方藝唯下品雖儒宮慕善
每嘗窺顏冉之牆而筆陣爭雄未得摩曹劉之壘但
以幸遊樂國獲覩仁風久貯懇誠冀伸歌詠輒獻紀
德絕句詩三十首謹封如別定王拙舞適足自嫌嫫
母濃粧轉爲人笑不足贊揚休烈翻憂晚黷尊威然

聖人以激勸誠深不間互鄉童子學者以揣摩志切
皆投鬼谷先生伏惟特恕荒蕪俯垂采覽所冀趨仁
化於江北終得傳美譚於海東唐突藻鑒下情無任
戰慄之至謹啓

謝職狀

右某今月二十五日伏奉公牒特賜署充館驛巡官
者恩降台階光生旅舍承命而吟魂乍懾叨榮而病
骨能蘇攀依有心荷戴無力伏以某樗生曠野莠託
荒田豈惟良匠不窺抑亦農人見棄風歆弱植難舉
勢於凌雲塵穢纖纖莖但懷愁於委地昨者不慚狷者

輒效狂生累貢巴詞仰瀆秦鑒伏惟司徒相公念以
來從異域遠寓樂郊俯愛似龍不嫌非鳳拔衰英於
糞上搜滯刃於獄中許廁嘉賓仍沾厚俸神仙見顧
稍親郭隗之臺驚蹇何施得主鄭莊之驛況乃念子
襟之志業辱華袞之褒詞刻畫恩深已能長價琢磨
志切終願成功修身則飲水懷冰鍊思則吟烟嘯露
唯當勵節以謂報恩謹詣衙門祇候陳謝下情無任
感激彷徨榮懼之至謹狀

謝借宅狀

右某昨日客司奉傳處分借賜官宅安下者仰聆尊

旨俯省庸才旣榮投跡之有門唯恨殺身之無路伏
以自趨龍旆免泣牛衣職奉非輕書糧頗贍嘗讀魯
論語曰學而優則仕仕而優則學是以望東開之閤
永誓依仁坐北面之牕惟期肄業非敢隱居而不嫁
祇將直道而自媒今者幸寓樂郊況棲靜室蓬屨則
不勞涉遠簞瓢則永遂安貧豈謂愛閑誠堪養勇三
年就學非□慕蘭之心一日成功願滿依劉之志下
情無任感恩激切兢惕之至謹詣衙門祇候陳謝謹
狀

出師後告辭狀

右某伏念來從異域託在德門昔曾名列桂科未知
稱意今忝職居蓮府始覺榮身恩旣厚於稻梁跡能
安於萍梗日增學植月瞻書糧豈期市駿之金榜沾
駑蹇惟愧封侯之印未效禎祥今者屬以大憝通誅
中朝多難頃煩豹略忙滅豺聲伏惟太尉相公身耀
福星均臨庶類手傾霖雨遍洗妖氛遠命舟師重興
國祚華夷則望風競扑蠢植則剋日當蘇若某者空
有肺腸方重禱祝恨無羽翼一遂奮飛望龍節以魂
銷覘虎威而股慄雖則熊羆之力共喜安人其如犬
馬之心常增戀主下情無任攀依激切涕泣之至謹

狀

謝令從軍狀

右某適見客司奉傳處分令借舟船隨從行李者深
恩既降壯氣潛伸勵心而願效驅馳感德而難勝踊
躍伏以某塵中走吏海外腐儒五能非自濟之資一
割無可施之處惟增慷慨已分沉淪豈無投筆之心
時應未偶空有請纓之志力且難成誰謂忽被殊私
不遺賤跡許隨旌旆借賜舟航蹇足無堪敢望維駒
之念麼姿何幸遽叨泛鷁之榮況當泣路之時永荷
濟川之賜下情無任感戴欣躍兢惕之至謹狀

謝借舫子狀

客司奉傳處分借賜舫子安下者某方脫窮鱗得攀
畫鷁自慙跡在塵吏忽訝身爲水仙則彼甘寧割錦
纜而呈奢顧愷毀布帆而無恙豈若榮棲德宇又泛
仙舟風波無失所之憂烟月有搜吟之暇況清流滿
望暑氣銷威每當定志安神則乃銘肌刻骨謹課七
言長句詩一首齋沐上獻于瀆台階下情無任荷戴
兢惕之至謹狀

謝許奏薦狀

右某昨日見衙前兵馬使曠師禮奉傳處分特賜慰

問兼許奏薦令自修狀本來者俯慙蓬跡仰聽蘭言
喜抃而身輕欲飛兢惶而心戰難遏何者某職叨鄭
驛已謂極榮名達堯階實爲過望憑何展效佩此恩
光況乃朗鑑冰開英才霧集所宜倒屣則先迎王粲
築臺則次接劇辛如某者輟耕海上之田來泣塵中
之路雖云游學尙未成功豈料勤勞莫副於指蹤將
念已全於卯翼許令伐善將使警愚每思邾子之驟
稱深慙速謗欲效黃公之多讓又恐失時冀緝拙詞
仰遵嚴命南宮适之問宣父實有所歸東方朔之對
漢皇甯辭自責旣忝風雷之變化伫期雨露之沾濡

下情無任感戴榮抃兢灼之至謹奉狀陳謝謹狀

賀破淮口賊狀

右某昨日竊聆淮口鎮狀報今月八日諸軍合勢殺戮狂賊已盡者伏以徐州賊黨偶因嘯聚敢恣喧張鴟梟同巢勢必不久蟻蝨相吊生能幾何猶懷拒轍之心未有返轅之意伏賴太尉相公雄聲遠振妙畧潛施謀安四方決勝千里遂使淮山樂境長成虎豹之威泗水孤城免作鯨鯢之餌功著於暫勞永息計資於彼竭我盈小盜旋除中興可望三軍之勇氣方振百姓之驚魂再蘇但仰恩威咸增抃躍謹祇候陳

賀謹狀

賀高司馬除官狀

某啓伏承司馬二十五郎榮膺寵命伏惟感慰伏以
漢朝美仕稱太傅少傅之榮晉代高流誇大阮小阮
之譽然而但欲脫身於利祿無非縱志於歌吟於臣
則虧報主之誠爲子則失榮親之節豈期太尉相公
重言天應美命風行遂令司馬二十五郎挂綵衣披
朱紱動高堂之喜色振德宇之嘉聲佐理多閑藹餘
芳於玉樹連官獨貴掩前哲於竹林某每愧小儒忝
棲大廈覩鵬鵬之逸勢貽燕雀之歡心下情無任抃

躍之至謹奉啟陳賀謹啓

謝職狀

右某志雖求已藝不及人伏蒙太尉相公仁慈肉被
摧骸翼成鰥卵難飾片言隻字粗伸感德懷恩今則
久貯血誠敢憑毫素先甘鼎鑊仰黷旌幢謹具長書
咨陳下情無任戰灼之至伏惟特寬罪誅俯賜念察
謹狀

長啓

某啓某伏以短綆不可以汲深頑鋒不可以剗滯是
故不能者止周任有言自宜量力而行豈可從心所

欲某東海一布衣也頃者萬里辭家十年觀國本望
止於榜尾科第江淮一縣令耳前年冬罷離末尉望
應宏詞計決居山暫爲隱退學期至海更自琢磨俱
緣祿俸無餘書糧不濟輒攜勃篲來掃膺門豈料太
尉相公迴垂獎憐便署職秩跡趨鄭驛身寓陶牕免
憂東郭之貧但養北宮之勇去年中夏伏遇出師忽
賜招呼猥加驅策許隨龍旆久倚鷁舟每恨布鼓音
凡鉛刀器鈍縱傾肝膽莫副指蹤遽蒙念以慕善依
仁特賜奏薦重言天應忝獲超昇若非九重倚賴於
功名十道遵承於法令則其恩命亦豈肯許某自江

外一上縣尉便授內殿憲秩又兼章綬且見聖朝簪
裾烜赫子弟出身入仕二三十年猶挂藍袍未趨蓮
幕者多矣況如某異域之士乎昔有一日九遷無以
及斯榮盛某嘗讀魯論見仲尼使漆雕開仕對曰仕
進之道未能究習善其深志夫子致悅某雖慙不敏
竊有慕焉昨蒙恩慈特賜轉職尋已具狀陳讓兼納
所賜公牒伏奉批誨卽有勅命但請收之某旣蒙未
允至誠固且仰遵嚴旨立愧形影坐驚神魂每當夜
對寒缸曉窺清鏡感激而頭橫涕雨憂惶而背浹汗
漿雖榮擺脫於風塵倍赧汚瀆於門館伏以太尉相

公雄名峻望碩德茂勳不惟雲覆九州抑亦風揚萬國寓目傾耳仰爲指南儒武所歸一人而已是以諸道景附馬首是瞻其如都統巡官須選人材稱職外塞四方之望內資十乘之威若今某塵玷恩知尸素□位但恐買戎狄之笑沽史傳之譏昔漢朝金日磾常在武帝左右帝欲別加寵遇日磾辭曰臣外國人且使匈奴輕漢某今日之請實在於茲諸廳郎官早陳公議蓋以賤無妨貴欲令夷不亂華某伏自前年得在門下更無知識惟謁諸廳幕中垂情幸而獲宥竊聆太尉相公去年夏於東塘顧問某之時諸郎官

同力薦揚和之如響遂沾厚遇遽竊殊榮昨者繼陳
讜言不徇尊旨實乃惜太尉相公之名望存淮南藩
府之規儀事體不虧裨贊斯在冬末面奉處分欲使
別開院宇雖承恩諾轉切憂懷何者六韜曰人才大
小猶如斗也不可盛石滿則棄矣故孔子云孟公綽
爲趙魏老則優不可以爲滕薛大夫今者甘寘嚴誅
輒傾真懇乞解所職官謗可也伏惟太尉相公特賜
允從令得其所儻蒙未垂擯棄猶許依棲則望或別
補冗員或薄支虛給一枝數粒可養羽毛斗水尺波
得安髻鬣固非矯飾廉讓爲名實願揣量分涯免成

負累恩德春秋傳曰齊侯使敬仲爲卿辭曰羈旅之臣免於罪戾施於負擔所獲多矣敢辱高位請以死告使爲工正不失令名故事昭彰卑誠惴惴守道而得無慚矣登門而免見別之但願藥曰留恩終有凌雲之望誓簪挂念永無委地之愁干冒台威下情無任懇迫憂兢之至謹啓

謝加料錢狀

右某今日某官奉傳處分每月加給料錢二十貫者某厚沾職俸過贍書糧羶羊之角且不羸覬鼠之腹能易滿惟憂福盛難報恩深豈料筆端乏白鳳之詞

日無可效囊底獲青鳬之術月有所增但懷臨谷之心恐敗負山之力惟願除供陋巷之食分濟遠鄉之親同感厚恩永傳遐谷或成浮費必速幽誅下情無任荷戴兢惶涕泣之至

謝衣段狀

某啓伏蒙恩慈賜及生衣段一十疋者伏以風雖解愠日可畏威始當蒸鬱之時忝受鮮華之賜敢效八公之侶欲銜六銖但隨百姓之歡同歌五袴況乃某幸趨台階榮託德門實資千載之遭逢每濟四時之服飾愍念而情踰父母稱揚而禮異賓僚今者輕縠

衫材細練構制俾趨儉幕許曳絺裾雖恩耀遠人足
呈妍於鮫室而名慙奇士甘致刺於鵝梁下情無任
感戴之至

謝借示法雲寺天王記狀

某啓昨日伏蒙恩慈借示修法雲寺天王碑綵毫乍
閱俗眼初醒惟慙鐵印之傭流忽覩銀鈎之妙迹旣
成國寶豈許家藏竊聆將勒貞碑始揮神筆嵐停滅
暑天酒呈祥固知垂露之蹤便成甘露況假崩雲之
勢永耀法雲宜乎琬琰之詞鑲彼瑠璃之地共傳嘉
瑞遠振芳聲然則隋煬帝之故都永爲寶窟謝將軍

之舊宅終作福田下情無任捧讀祠禱榮懼之至其
碑謹專諮納謹狀

謝示延和閣記碑狀

某啓昨日觀察衙推邵宗奉傳處分賜及延和閣記
碑本一軸者跪展眞蹤仰窺臣節對銀鈎而手舞足
蹈望玉輦而魂飛膽揚伏以太尉力贍補天心勤捧
日遂啓遷都之議佇聆徙蹕之期恭候宸遊儼成壯
觀但以尋章摘句素非吳主之心進牘抽毫惟在陳
王之命爰令幕客謹撰碑詞支使侍御上門顏回鴈
帳廬植能揮眞筆妙寫尊襟敘三年望幸之丹誠則

鼓傳衆聽述一片勤王之忠節則鏡照羣迷實乃酣
飫德馨備陳事實永使奇功秘畧皆令陋古榮今太
尉相公志切迎鑾喜勝覽檄旣贊美於凌雲百尺將
掩能於入木八分遂乃親染綵毫俾鐫翠琰隨手而
龍蛇旋活迎鋒而劒戟交橫畫玉點珠豈可比蘭亭
醉本撇雲挑霧只宜示蓬島眞仙誰料未儒亦叨殊
貺輒敢覬覦將顧是知誘諭孱庸何則名題桂宮跡
隸蓮府雖忝一時之有遇實無萬代之可稱今者支
使侍御以好善心得稽古力騁眞才子之藻思辱大
丞相之筆蹤推爲賓席殊榮別是儒家盛事則彼郭

隗受黃金厚禮虞卿沾白璧深恩強欲比方却成浼
瀆然則四方舐墨含筆之士也莫不競效顰眉之態
潛希唾口之恩仰脩脩然勤慥慥爾如某者學海至
海雖云有心執柯伐柯猶恐傷手持弊帚而徒增健
羨遇神雖而便欲投降惟願讀五千卷之書庶幾入
室把十九年之刃無愧發硎每覩仙書更敦壯志稍
希異闕黨童子何敢望儒林丈人其所賜碑惟慎捧
持敢矜披閱待過天池之外遍誇日域之中想彼驪
龍頷下之珠永當減價巨鼇頭上之客必欲偷看下
情無任寶玩師仰之至

謝改職狀

右某伏蒙仁恩特賜公牒改署館驛巡官令隨旋旆
西去者雖命重難荷而身輕欲飛稱心懷捧檄之榮
滿口詠從軍之樂惟慙幽劣有辱獎怜感恩而旣識
海深舉步而但憂冰薄況無孫搴之精騎自比顏峻
之小兒將何以剖析事機游揚德業然所願者得睹
龍飛玉劍豹掣牙旗風雷振大捷之聲日月照中興
之運則某也有望於一言長價或爲天上之人萬里
從知免作池中之物行惟踴躍坐則禱祠下情無任
榮抃兢灼之至謹齋沐祇候陳謝

謝探請料錢狀

某啓某頃者西笑傾懷南音著操蓬飛萬里迷玉京
之要路通津桂折一名作金榜之懸疣附贅乃是常
常之事徒云遠遠而來海隅未覺於榮家江徼況勞
於佐邑由是詠南陔而引咎望東道以知歸伏蒙太
尉念掃德門許遷代舍濡毫染牘深慙雪苑之清才
頂豸腰魚遠忝霜臺之峻秩傳天上披衷之命榮日
邊垂白之親以宣父見知則實同陳準以遠人多幸
則不讓漢貂雖乖就養無方久想宗族稱孝然而煙
波阻絕難申負米之心風雨淒涼空灑梁山之泣旣

疏溫清又闕旨甘但切責躬敢言養志況又無鄉使難
附家書惟吟陟岵之詩莫遇渡溟之信今有本國使
船過海某欲買茶藥寄附家信伏緣蹄涔易竭溝壑
難盈不避嚴誅更陳窮懇伏惟太尉念以依門館次
三千客別庭闈已十八年旣免行傭有希及哺特賜
探給三箇月料錢所冀祿遂及親遠分光於異域志
能求已永投跡於仙鄉干瀆台階下情伏增感泣兢
悸懇迫之至其請錢狀別具上呈云云

與恩門裴秀才求事啓

某伏念身托德門光生異域雖池蛟得雨無沉埋末

路之憂而海燕含泥有點污畫梁之罪跡賤而兢惶
倍切恩深而展效何期豈合更寫卑誠仰塵尊聽但
以事非獲已情或可哀不辭鈇鉞之誅冀滿斗筲之
望伏緣某昨聆座主侍郎主銓東洛道路不通且在
襄州行李極困早欲發遣專使切緣力未副心今有
諸兄弟裴瓌遠將窮懇相告輒具別狀干瀆台階下
情無任戰灼之至

前湖南觀察巡官裴瓌

右件人是某座主侍郎再從弟某去乾符三年冬到
湖南起居座主侍郎之時見於諸院弟兄中偏所記

念自數年繼遭剽刼生計蕩盡骨肉凋零久在江南
近投當府願披情懇泣告尊慈駐留多時不幸疾苦
遂且扶持發去云欲逕往襄陽迎接侍郎今得書云
行至滁州前去未得道途旣阻溝壑是虞況孤孀三
十餘口更無產業未卜定居伏緣某家寄日邊路踰
天外杳無來信固絕他圖旣無寸土以分耕甯有尺
波而假濶是以不量僭越輒具薦論命懸沸鼎之中
目斷台階之下非不知捋虎鬚之險非不知探龍頷
之難但緣旣忝門生豈論賓貢鴛鴦之與螻蟻感恩
皆同多士之與遠人報德何異伏乞太尉相公念以

程窮計盡憫其柱促聲哀特賜於廬壽管內場院或
堰埭中補署散職所冀月有俸入便獲安家裴璚卽
自到襄州令弟璿仰副驅策不度涯分浼瀆尊嚴下
情無任感泣兢懼之至

獻生日物狀

某啓伏以降跡仙山爲行恩於俗界挺神維嶽期定
亂於危時是以杞梓材長松椿壽永名字已標於金
籙兵符暫理於玉鈐伏惟太尉相公員嶠稟靈尼邱
誕質大任天降中庸日彰四夷識傾膽之門遠棲仁
蔭萬姓歸返魂之域盡飽德馨況今秦甸停氛鎬京

聚孽息虎旅奔沉之患望豹篇擒縱之機暫施決勝
之謀永致昇平之運則必坐監環海後當去會瑤池
五色輕雲鎮隨行止千年素鶴競效驅馳獨保長生
却登眞位調鼎佐玉皇之命銜杯聽金母之歌自此
漢室公卿仰羨而空知望斷仙家朋友相逢而不訝
來遲某居近鰲峯遇深驥坂每睹張良之術惟吟郭
璞之詩喜對今辰敢陳善祝龜蛇病骨叨承救活之
恩雞犬癡心竊有奮飛之望下情無任虔禱依攀欣
抃之至輒以海東藥物輕贖尊嚴謹具別幅伏惟俯
賜念察謹狀

又狀

某啓某聆天降賢人濟天下之人也是以材合地寶
性契天和高闕德門深匡帝室伏惟太尉相公漢師
仙格魯聖儒機推心於三代之英鍊氣於五行之秀
今者正融韶景其慶誕辰四方飽開閣之恩萬族獻
稱觴之懇伏惟龍韜暫展靜卷妖氛鳳輦遄歸永興
清運然後誠白石生之妙術從赤松子之勝遊鰲頭
擎五色之雲久勞西望豹尾指二京之路暫事北征
伋揚滅寇之勳便舉朝真之禮某棲身大廈祝壽中
春下情無任禱祠歌詠欣躍之至謹具別狀輒申微

誠伏惟恩慈俯賜念察謹狀

物狀

海東人形參一軀 銀裝龜子盛

海東實心琴一張 紫綾帟盛

右伏以慶資五福瑞降三清中春方盛於香風上德
乃生於遲日凡荷獎延之賜合申獻賀之儀前件人
參并琴等形稟天成韻含風雅具體而旣非假貌全
材而免有虛聲況皆採近仙峯攜來遠地儻許成功
於藥曰必願捐軀如能入用於蓬壺可知實腹誠慙
菲薄冀續延長塵黷尊嚴倍增戰灼伏惟俯賜容納

下情幸甚

蓬萊山圖一面

右伏以重陽煦景仙界降眞雖長生標金籙之名而
衆懇祝玉書之壽前件圖千堆翠錦一朵青蓮雪濤
蹙出於墨池鯨噴可駭雲嶠湧生於筆海鼇戴何輕
不愧瑣微輒將陳獻望臥龍而股慄隨賀燕以魂飛
伏惟畧鑒心誠俯賜容納所冀近台座而永安寶海
展仙齋而便對家山許沾一顧之榮預報三清之信
輕贖視聽下情無任禱祝歌謠兢灼之至

人參三斤

天麻一斤

右伏以昴宿垂芒尼丘降瑞始及中和之節爰當大
慶之辰仰沐尊慈合申卑禮前件藥物採從日域來
涉天池雖徵三桎五葉之名慙無異質而過萬水千
山之險貴有餘香不揆輕微輒將陳獻所冀海人之
藥或同野老之芹伏惟特恕嚴誅俯容情懇續靈壽
則後天而老駐仙顏而與日長新下情無任禱祝欣
躍兢惕之至謹狀

端午節送物狀

織成鞦韆一條

右伏以晏陰將定令節俄臨遇天地之仁時睹江淮

之樂境伏惟太尉應五百年之運用八千歲爲春仰
贊熏風高揚畏日不假渡瀘之役自成匡漢之謀某
忝在末寮合成微禮前件鞍幙駕機呈妙獸錦成華
當懋影於追風或資光於照地伏願鞍也助百福永
安之慶幙也表四方率服之誠干瀆尊嚴下情無任
禱祝兢惶懇激之至伏惟俯賜容納謹狀

雪扇一柄

右伏以星火揚輝雲峯聳影遇陳太守饗遙祠之節
效華封人祝仙壽之誠前件扇細糝飛綿輕鋪凍練
雖假丹青之迹實含潔白之姿裁規則不學齊紈空

誇圓月委質則願依孫閣得振仁風謹獻台堦無任
悚慄伏惟俯賜容納百生榮幸謹狀

謝新茶狀

右某今日中軍使俞公楚奉傳處分送前件茶芽者
伏以蜀岡養秀隋苑騰芳始興採擷之功方就精華
之味所宜烹綠乳於金鼎泛香膏於玉甌若非靜揖
禪翁卽是閑邀羽客豈期仙貺猥及凡儒不假梅林
自能愈渴免求萱草始得忘憂下情無任感恩惶懼
激切之至謹奉狀陳謝謹狀

謝櫻桃狀

右中軍使俞公楚奉傳處分伏蒙賜及前件櫻桃者
伏以三春之下始閱羣芳百果之中獨誇先達綴仙
露而堪教鳳食被德風而肯許鸞含遂令摘自喬枝
分其美實豈期末品亦荷深恩捧持而色奪楚萍咽
嗚而味欺蘇橘何必貯赤瑛盤上最宜對白玉樽前
勻排萬顆之珠不惟眼飽似服一丸之藥便覺身輕
下情伏增感戴之至謹奉狀陳謝謹狀

謝冬至料狀

右伏蒙仁恩特賜前件節料者伏以某忝棲德宇不
愧異鄉萬里滄波雖恨絕東來之信三冬愛日且歡

迎南至之辰豈料尊慈別垂厚賜玉粒旣資於同穎
霜華乃出於兩岐不勞大嚼之言却懷中聖之慮莫
識酬恩報德惟知飽食醉吟下情無任兢懼之至謹
狀

謝寒食節料狀

右伏蒙仁慈特賜前件節料米麪羊酒等者伏以口
入舉令回祿沮威正吟化俗之仁風又對順時之甘
雨仰沾豐饌遇瞻新炊況乃蟻慕芳羶蛆浮清醞捧
恩光而飽飫豈止三朝玩春色而醺酣可期千日祗
知歌詠何報陶鈞下情無任感戴之至謹奉狀陳謝

謹狀

謝社日酒肉狀

右伏蒙恩慈特賜前件酒肉等者伏以候燕應期句
龍受祀一半之韶光欲老千般之旅思相攻只知吟
樂國之春豈料捧仙家之賜陵分甘隴淮減香醲想
田夫醉舞之場起海客狂歌之興敢效陳平壯志便
發大言惟尋徐邈前蹤畧判中聖其肉并酒謹跪領
訖下情無任感戴之至謹狀

謝正段狀

緋羅

紫綾

紫天淨紗

紫平紗

黃平紗 黃綾 黃絹 熟綿綾袴段

右伏蒙仁恩特賜前件正段霞舒鳳縷雪疊鮫綃猓
分絳帳之餘俾換褐袍之飾不學王尼巧說遽叨盧
志殊榮惟慙螻蟻之姿不稱蜉蝣之什但願勵食蘗
飲冰之節報披朱拖紫之恩下情無任感戴兢惕涕
泣之至謹奉狀陳謝謹狀

唐文拾遺卷之四十三

榮祿大夫三品頂戴前分巡廣東高廉道加四級臣陸心源輯

崔致遠

上座主尙書別紙

不審近日尊體寢膳何似道惟滌慮德以潤身致五
福之併臻迎百靈之所薦伏惟節宣無爽時望有歸
某竊窺曩史之傳芳備載達僚之晦跡疏太傅登其
祖帳僅涉沾名陶朱公泛彼柏舟未忘邀利豈若尙
書中庸守志大隱存神表獨見之能察未萌之事遂
得高揚素節夙避危時到處煙塵不污指鴻之目終

年雲水能怡夢蝶之心然而宸鑒屢回物情猶鬱欲
作山中宰相其如天下蒼生卽期大駕還京必赴上
台虛位斯乃萬乘瞻矚四方禱祈某海燕含泥忝棲
雲屋池蛟得雨早脫塵塗感恩自比於互鄉仰德但
思於闕里惟願泥沙賤質永資陶冶深恩卑情不任
攀戀虔祝涕泣之至謹狀

賀除吏部侍郎

某啟伏承榮膺寵命伏惟感慰張司空之一匡西晉
則藻鑒無倫謝太傅之忽起東山則烝黎是念苟欲
幽棲悅志獨處忘懷緘輝而恥耀秦臺蘊味而懶調

殷鼎則乃智者仁者止傳樂山水之名賢才俊才盡
失脫塵泥之望羣情久鬱美命遂行今者侍郎靜揖
巖扉高提銓管萬族仰清通之譽一時進寒素之徒
致使關中之寇孽災消海內之英雄道泰近又竊聆
風議仰順天心必謂文司再歸重德然則任賢得地
旣叶五百年之期好學趨門必盈七十子之數繼集
仙遊於蓬島盛傳儒禮於杏壇旣搜虹玉驅珠皆成
國寶仁見臺鸞閣鳳永作家禽某伏思萬里無依久
勞漂蕩十年有遇幸遂奮飛異鄉榮垂白之親達路
忝披朱之飾昔名士爲李公御者喜扑猶多今遠人

稱尼父生徒光輝無比陳至懇而喙輪三尺望深仁
而腸結九回下情無任抃賀踴躍感激之至伏惟俯
賜念察謹狀

賀除禮部尙書別紙

伏承天恩榮膺寵命伏惟感慰昔子貢曰夫子之文
章可得而聞夫子之言性與天道不可得而聞也然
則至於四科弟子窺測尙難況是萬里遠人鑽仰何
及固不效尤於篆刻請益於琢磨強搜類鶩之詞是
黷猶龍之德今者遠聆美命俯切歡心望峻中臺迥
冠鴛鷺之列恩深大厦空傾燕雀之誠伏惟捨念雲

泉拯民塗炭輔弼契千年之運奸雄避七日之誅某
跡忝諸生身拘倖職末由陳賀下情無任抃躍兢惶
禱祝之至伏惟俯賜念察謹狀

濟源別紙

不審近日尊體何似伏想孟津別壤沅水清源風晴
而欹枕泉聲雲曉而卷簾山色旣見境含秀麗固當
道脫冲和伏惟每慎寢興早歸燮理顯驗月中之夢
贊成天下之春卑情無任攀戀禱祝之至謹狀

迎楚州行李別紙二首

不審近日利涉長淮尊體寢膳何似伏以源滋桐柏

浪接蓬萊雖漸臨鬱悞之期而宛對清虛之境開樂
鏡而眞同月暎泛膺舟而況值風調誰言避地之行
實叶濟川之業伏惟緩飛仙棹靜運眞筌庶納休禎
每加遵護卑情懇望謹狀

又

某啟今月某日專使至伏蒙恩慈特降尊誨跪讀欣
抃不任下情伏審尙書遠赴天庭將遵水道整蘭橈
而思郭泰指桂苑而訪劉安嗜神仙則楚俗皆驚聞
雅頌則魯儒相賀況某材實慙於楷矢跡嘗列於蓬
壺爲倚德門獲棲候府今者伋迎鶴駕卽覲龍章旣

知天幸遭逢惟切日深踴躍且曾暫陳浴沂之志只
見虛談仲由悅浮海之言終非實事輒以管窺筵擊
眞爲古陋今榮卑情無任攀戀欣抃兢惕之至云云

五月一日別紙

某啟伏以黃雀風高蒼龍星耀弄雨而梅雖應夏鋪
煌而麥已驚秋時定晏陰□資全德伏惟尙書處身
無躁深守禮經視履考祥雅符易道恬澹則老聃讓
美清虛則周顓懷慙水光長泛於玉壺豈須獨映天
意久留其金鼎惟望親調方當鵲泛仙舟必見鳳銜
睿筆入康帝室永福寰區下情無任虔禱鬱戀激切

之至謹狀

謝降顧狀

某啟某未遂山棲尙從塵役所居官舍深在軍營雖
異衡門實同陋巷旣乏君章之蘭菊可襲馨香空餘
仲蔚之蓬蒿偏資寂寞春日則蝶牽晝夢秋風則蛩
助夜吟以此爲娛無他所覲今者方經離亂再獲起
居但喜攀父母之恩却慙下兒女之淚況某叨榮秦
爵就學漢儀姜維之膽氣雖麤鄧艾之口詞甚訥惟
深感激莫備啟陳伏蒙尙書念以遠方察其獨立俯
憐素志每煦溫顏聽及階及席之言伋銘骨銘肌之

懇早來又蒙降三清之仙駕顧一畝之窮居方慙隨
入室之賢豈料忝式廬之念非所敢望將何自安莫
不恩光遠耀於殊鄉卑迹永超於末路揣庸賤則華
夷有隔較輝榮則古今無倫數年乖豹隱之期常低
俗眼此日覩鳳儀之後豁展愁眉下情無任感戴欣
抃兢惕之至謹祇候起居陳謝謹狀

與金部郎中別紙二首

不審近日尊體寢膳何似旣明且哲則詩美賢人視
履考祥則易稱君子旣樂持盈之道固安養素之機
況屬遲日載陽光風遍煦燕歌鸞舞深資酌桂之歡

智水仁山靜悅據梧之興伏惟永資景福早副急徵
擲立賞於煙霞濟蒼生於塗炭羣情禱望天下幸甚
謹狀

又

某啟某仰審格言側窺性行人能弘道賢臣以致堯
舜爲先世寶須才俊士以效巢由是恥古者只傳於
方策今也共仰於德門伏惟郎中大雅含清中庸處
厚旣以高名肅物能將全德鎮時柱晴空而嶽頂無
雲瑩秋色而潭心有月比者蘭拋粉闥竹領朱轡出
分天子之憂來慰海人之望況彼郡也戶吞越水牕

列吳山得袁宏舉扇之風靈濤縮怒使謝運枉帆之
路釣渚含春及其五袴傳歌百錢流譽尋迎睿渥遙
陟華資懷寶令名誰發迷邦之間司珍正位仁成匡
國之謀而乃得之若驚直而不倨選勝於巖軒澗戶
貪歡於酒賦琴歌久聆萬乘虛懷忍見四方失望今
者梟聲向息鳳紀重興晉傅長才待示指南之制魏
牟積變仁申拱北之誠入覲冀堦坐調梅鼎豈止應
月中之夢必期成天下之春然則致堯舜之大猷永
匡宸展效巢由之小節不介尊襟某遠賣鯨綃慙非
重價仰趨馬帳忝預生徒下情無任攀戀禱祝兢惕

之至云云

與客將書

某腐芥無依斷蓬自役長走而未離塵土獨行而轉
困路歧昨者遠抱危誠專趨朗鑒竽聲恐濫琴調空
悲伏蒙將軍念以來自異鄉勤於儒道曲垂提挈得
遂獻投指喻情深師冕不爲瞽者獎知言重卞和免
作罪人荒淺何堪輝榮已極但以某無媒進取有志
退居以詩篇爲養性之資以書卷爲立身之本却緣
雖曾食祿未免憂貧趙囊則到處長空范甌則何時
暫熱況乃家遙四郡路隔十洲窮愁則終夜煎熬遠

信則經年阻絕時情冷澹俗態澆訛買笑金則易求
讀書糧則難致天高莫問日暮何歸始知學者之心
須託至公之力今幸遇相公山包海納雨潤風行有
片言可獎者稱譽出羣有小技可呈者隨材入用是
以無一物不歸美化無一夫不荷深恩然則舉中國
之人咸承煦育豈可令外方之士獨見棄遺某不揆
庸才敢投清德豈料將軍許垂拯拔每賜吹噓他人
之得喪榮枯皆推命分小子之昇沉進退只在恩私
儻或特假重言終榮賤質惟托針能入線則同雖得
處囊某已倚宦途粗諳吏道如能驅策未必跼藏終

當富見室家豈憚職榮州縣實以流年易邁壯氣難
申惟望庇庥得期變化所冀燕棲雲屋永無巢幕之
危鶴出塵籠稍識乘軒之使今欲專脩啟事再獻相
公少申感謝之懷預寫辭違之懇未知可否先取指
麾且某也姜維之膽氣雖麤鄧艾之口辭甚訥縱申
拜謁難具啟陳聊托牋毫代披肝膈未能患已先切
求仁將軍之心若鏡焉無幽不察小子之身猶箭也
惟命是從干浼旣頻慙惶益切伏惟終始俯賜念察
謹狀

謝宋綯侍御書

伏蒙殊造俯念移居借賜官車得離旅館簪笈則免
勞自負簞瓢則各識所安如承命駕之恩但勵抹輪
之志今者卜鄰甚靜學植可成惟屬袁粲之門不掃
陳蕃之室雖乘機立事輸他附勢之榮而守道安貧
贏得愛閑之樂既諧素志但感深恩伏惟終始俯賜
念察謹狀

答裴拙庶子書

某遠離海島旅宦江皋比者暫願退居稍期肄業來
投樂國冀濟窮塗本望少瞻山資便諧谷隱伏蒙太
尉念以雀有多病鶴自遠來特署職名俾趨恩化等

緣狂花有失腐芥無依轉知山鹿野麋惟宜退縮永
謂鴻儔鵠侶不合攀瞻況乃器比斗筭之人身隨刀
筆之吏旅舍旣拘於雉堞閑門可設其雀羅自前年
伏承庶子暫阻朝天偶來避地便欲托金牌之幸會
敘玉季之獎憐專候起居願搜誠懇蓋慮跡賤而動
多悔忝才微而易見棄捐強自微攀舊恩是爲玷浼
清德以此跼藏形影綿厯歲時雖知提筭有門惟恐
負荆無路豈料庶子恕以未陳禍刺先降劉賤閱溫
言而楚紱覆身捧華翰而隋珠耀掌兼蒙賢弟起居
未移曩顧遠賜榮緘不遺異域之人特辱同年之字

金膏珠粉旣垂摩拂之恩驥尾龍髯重有依攀之望
莫不駑駘長價瓠甌生光不惟誇衍於親朋實所輝
榮於遠俗謹當占筮撰日齋沐拜塵臚肝而盡慝卑
誠擢髮而少逃厚責其他所奉尊旨謹具別狀啟陳
云云

謝高秘書示長歌書

伏蒙特飛榮誨寵示長歌玉海金山難測高深之本
北方南國徒觀美麗之姿贊詠無堦師資有路但如
青蓮居士惟誇散誕之詞白石山人只騁荒唐之作
但以風月琴樽爲勝概不以君臣禮樂爲宏規遂使

千年萬年所流傳皆嗟大雅小雅之淪弊今觀四十
三叔行出人表言成世資弄才子之筆端寫忠臣之
襟抱在今行古既爲儒室之宗憂國如家固是德門
之事天有耳而必當悔禍雲無心而亦可銷兵一言
自此興危邦六義於斯歸正道則所謂陳平宰社爾
曹何知鄧艾畫營其志不小永言他日足驗前程某
畏影雖迷偷光匪懈既知閱寶直若發蒙惟願將鵬
舉篇章傳於異域豈獨以伯魚對答誇向同聲下情
但增感戴欽仰降歎之至續專祗候陳謝

謝李琯書

某啟某今月十日得祗候見太尉渤海風息蓬萊路
通慙非席上之珍謬作壺中之客伏蒙溫顏見照陋
質增榮鳳翼龍鱗終容攀附癡鷹鈍犬特許指呼勉
其檢慎之心論以獎憐之意此皆副使不遺薄藝累
發重言始當獨臥北牕如蛙跳井豈料榮趨東閣似
鶴乘軒風雲旣識於因依冰谷不遑於安處感深惟
泣誠止無言伏緣旣忝從軍難爲乞假不獲祗候陳
謝

謝元郎中書

某啟伏蒙太尉恩慈特賜轉職不任歡慶某立兔微

卷四十三
一
儒焦螟瑣質早因慕善偶獲成名爾後客路多愁侯
門寡援麻衣始染於藍色竹簡尋攤其桂香伏自去
年刺謁燕臺職叨鄭驛皆蒙郎中推心獎念假力薦
揚使孤根無委地之虞短翮有凌雲之望今者忽忝
非常之遇深慙不稱之譏雖樂從軍敢安尸祿且鷄
披隼翼已覺非宜雞處鶴羣固當自責時日已具狀
辭讓以此未敢祗候陳謝伏蒙恩私特降榮誨奉讀
欣抃不任下情

謝周繁秀才以小山集見示

昨日早謁立成晚歸弊止覺戶庭之發光彩聞机案

之散馨香遂因驚訊僕夫果得捧承留示溫辭一幅
粲然受益之規雅什九篇蔚矣患多之思莫不振紀
綱於六義飾冠冕於七言旣崇大雅之基實播中和
之響伏以諸從事鴻儔鵠侶鳳翥鸞翔集桂苑之名
都占蓮池之雅望二十三官卽先輩備觀周樂深閱
楚材各陳贊詠之詞能展縱橫之作筆皆實錄機不
虛張始窺八首之前只謂衛多君子終覽九華之後
方知魯出聖人某今所以禱望者翠輦早遇東巡日
環免勞西獻二十三官百步穿葉一飛冲天姮娥則
迎入桂宮王母則引歸蓬島然後輟勝遊於御氣展

長策於濟時來登郭隗之臺坐弄陳琳之筆則乃今
朝麗藻已掩八仙公之名他日賓筵必盈七才子之
數見邱門之請禱待陳榻之解懸某便欲銜璧乞降
摳衣請益但以志勤詞戰雖將築室反耕道拙世塗
僅類杜門却掃未獲面申感謝謹專修狀啟陳云云

與壽州張常侍書

當今聖天子在上賢丞相在下然而宿德令望而推
者惟我上公暨滑臺中令兩地而已初常侍靜芟前
弊權握使符我上公以理狀聞請爲眞守帝惟曰俞
後常侍撫安郡俗振肅兵威大元帥以雄才薦請貳

前驅帝亦惟曰俞是得弄印分榮剖符行化踰月報
政盡活疲吐實謂壽之人永居壽域矣則乃常待遇
賢丞相之知入聖天子之用乃武乃文多才多藝固
以播在四海某豈敢一二而談詠也今所禱願者碧
幢紅旆高引前途相幕將壇別張勝地謂予不信神
之聽之

賀楚州張義府尚書

國家自兵興已來爵賞旣多官榮甚峻然而常恐授
受之未能宜稱盡善盡美固當有待今則尚書以累
世勲望以數年戰功始假使符旋迎眞命某將趨清

德獲聽好音欣抃之來雀躍而已則非獨喜尙書展
翼黃之美政實乃賀聖天子之得良二千石也伏惟
云云

與假牧書

伏以近日辱尙書題言矜贊祝苟非全德多是愧辭
某執性近愚處身斯直以目所覩以耳所聆方敢詠
歌固無諂笑某自達仁境如歸故鄉見百姓之安則
知三軍之樂也見鄉間之泰則知郡邑之肅也若非
常侍寬猛相濟恩威并行則何以至村落之居室家
相慶自近及遠嬉嬉然喜遇慈父然則政成一境名

達九重卽計冠聳豐貂旗翻建隼榮膺眞拜太治羣
情某每聽謳謠深增禱祝伏惟照察謹狀

謝許歸覲啟

某啟早來員外郎君奉傳尊旨伏蒙恩慈念以某久
別庭闈許令歸覲者仰銜金諾虔佩玉音雖尋海島
以榮歸古今無比且望煙波而感泣去住難安伏緣
某自年十二離家今已二九載矣百生天幸獲托德
門驟忝官榮仍叨命服一身遭遇萬里光輝是以遠
親稍慰於倚門遊子倍榮於得路惟仰趙衰之冬日
深暖旅懷豈吟張翰之秋風遽牽歸思且緣辭鄉歲

久泛海程遙住傷烏鳥之情去懷犬馬之戀惟願暫
謀東返迎侍西來仰託仁風永安卑跡今卽將期理
權但切戀軒下情無任感戴兢灼涕泣之至謹奉啟
陳謝云云

謝行裝錢狀

伏蒙仁恩特賜錢二百貫又令辦行裝者謹依處分
捧領訖伏以某學虧力行事過心期燕背銜泥點污
常慙於廣厦鼉頭抃嶽低徊暗避於連鈎每慎行藏
深規躁靜豈謂謙而受益或希屈以求伸今者果逢
尊慈令將遠命榮歸故國免挈空囊比陸生南說之

橐裝倍多輝煥異孔氏東還之輜重豈慮焚燒且彼
虞卿白璧郭隗黃金徒欲耀名終非濟事曷若念其
就養煦以食貧減二十日之堂封濟數千里之家信
累載莫申其勞苦一朝頓贖於旨甘寧親而旣佩銀
章倍榮衣錦戀德而但垂珠淚願效賣綃下情無任
感恩榮抃涕戀兢惕之至云云

謝再送月料錢啟

某啟昨日軍資庫送到館驛巡官八月料錢伏緣某
將命遠方已奉公牒暫離候館卽指歸程旣蒙別賜
行裝豈令□□職俸□難領受遂便送還不知庫司

具狀申上□伏奉□□者筆飛雲鳳顯示深恩緝躍
天龍仰資厚□□遂還家之望實驚潤屋之言遠地
賤微雖有慙於 故鄉親識必致敬於金多通神
則益驗魯褒執癖則□□□□伏以尊卑禮隔辭讓
無由謹依處分跪領訖下情無任感恩戀德激切徘徊
兢灼之至云云

謝賜弟棲遠錢狀

某啟某堂弟棲遠比將家信迎接東歸遂假新羅國
入淮海使錄事職名獲詣雄藩將歸故國昨者伏蒙
仁恩特賜錢三十貫者伏以崔棲遠遠涉煙波大遭

風浪僅存微命惟有空身雖志切鵲鴿竊慕在原之
義而譽慙騏驎難期得路之秋銜蘆而但喜聯行泛
梗而免虞失所今者某已榮奉使則遂寧親貨泉沾
潤之名實稱子母歸路光榮之事皆屬善人下情無
任感恩欣躍兢惕之至

上太尉別紙五首

某啟昨以鄉使金仁圭員外已臨去路尙闕歸舟懇
求同行仰候尊旨伏蒙恩造俯允卑誠今則共別淮
城齊登海艦雖慙李郭之譽免涉胡越之言遠路無
虞不假琴高之術巨川能濟惟懷傳說之恩卜情無

任感戀之至云云

又

某啟伏奉手筆批誨一行人並善將息穩風濤者俯顧微流仰窺尊念望淮海則陟遐自邇指風波則視險如夷遍灑溫言盡叨恩於挾纊□敷至懇願無愧於賣綃下情無任感激攀戀兢灼之至云云

又

伏奉尊誨藥帋子懸於船頭不畏風浪慎勿開之者仰掛青囊遠踰碧海必使天吳息浪水伯迎風旣無他慮於葭津可訪仙遊於蓬島惟願往來無滯忠孝

克全萬里安流永口濟川之力百年苦節不欺臨谷之心下情無任感戴兢灼之至

又

某舟船行李自到乳山旬日候風已及冬節海師進難懇請駐留某方忝榮身惟憂辱命乘風破浪旣輸宗慤之言長楫短篙實涉惠施之說雖仰資恩煦不憚險艱然正值驚波難踰巨壑今則已依曲浦暫下飛廬結茅茨以庇身慘藜藿而充腹候過殘臘決撰行期若及春日載陽必無終風且暴便當直帆得遂榮歸謹具別狀咨申伏惟云云

又

某啟自叨指使惟欲奮飛必期不讓秋鷹便能截海
豈料翻成跂蹙尙類曳泥雖慎三思而行且乖一舉
之雋旣勞淹久台具啟陳某嘗讀國語見海鳥爰居
止於魯東門之外展禽曰今茲海有災乎夫廣川之
鳥獸常知而避其災是歲也海多大風冬晡伏見今
年自十月之交至於周正月略無感發□覺溫燠必
恐魯修濫祠幽改成詩靜思漢祖之興歌大風可懼
遙想田橫之竄跡絕島難依遂於登州近浦止泊籠
鵠無失藩羊自安惟願時然後行必當利有攸往泛

艤艘而不滯指渤澥而非遙冀申專對之能早遂再來之望伏惟云云

祭巉山神文

維年月日新羅國入淮南使檢校倉部員外郎守翰林郎賜緋銀魚袋金仁圭淮南入新羅兼送國信等使前都統巡官承務郎殿中侍御史內供奉賜緋魚袋崔致遠等謹以清酌牲牢之奠敬□懸于巉山大王之靈竊以昔辨方員始分清濁融作江海結爲山岳石戴土而土戴石小者礫而大者礧然而罕有威神靜無稜角與堆阜而相接見邱陵之可學惟靈磊

磊落落高臨鯤壑巉巉品品俯壓鯨潭上則爲雲霧
縈纏之骨下則爲波濤激射之窟朝則迎金烏而前
出夜則送銀蟾而後沒是以峻德能彰乎東夏西夷
玄功不假乎南嶠北忽則彼織女之機倚河漢秦帝
之橋架溟渤徒衍其名莫勞我形每謂蘊藏其片玉
豈惟廁列於雙瓊遂使往來者虔虔英靈祈禱者盡
寫精誠旣蘋蘩之可薦信黍稷之非馨今者仁主等
久銜遠命致遠也始奉殷聘喜歸舟之旣同伴遊轡
之能并不患胡越之意殊寧慙李郭之名盛去歲初
冬及東牟東屬以滄流尙遠玄律將窮浪形勾蠲而

鵲難浮艦風響羈羶而鵲恐辭籠遂艤刻木聊安斷
蓬一昨雖迎端月猶懼俊風延頸而待逢候燕回眸
而送盡歸鴻方期利涉龜從筮叶直指雞林輕浮芥
葉豈輸馳馬之號願較秋鷹之捷遠詣靈峯難尋壽
宮但覩其青蓮倒蘸於巨浸碧螺高柱於晴空仰威
靈之聳塵外想影響之飄雲中於是潔饋饕擇肥醴
酒醴斯醺牲牷粗豐謹賁薄禮敢覬陰功伏惟大王
潛施呼喻密降指蹤使波神拱手川后歛容楚師之
南風且競鄭伯之東道豁通照水鏡之心旣分妍醜
擘土囊之口無雜雌雄則可朝穿汗漫暮截鴻濛去

採石華必同謝運行吟肉脯免效張融加以某臨川
自審登木增懍憶昔雪作夜光冰爲夕飲幾年獨勵
於鼓篋今日方期於扇枕將問荊州之絹忝披會稽
之錦見寵若驚心如捧盈雖智有不逮而時然後行
況賁御筆慮滯王程今則褻裝旣飾儼有行色翫淑
景以歌吟汎安流於瞬息惟托大王之風早歸君子
之國俾傳帝命無曠神職尙饗

進詩賦表狀等集狀

右臣自年十二離家西泛當乘桴之際亡父誠之曰
十年不第進士則勿謂吾兒吾亦不謂有兒矣往勤

哉無隳乃力臣佩服嚴訓不敢弭忘懸刺無遑冀諧
養志實得人百之已千之觀光六年金名榜尾此時
諷詠情性寓物名篇曰賦曰詩幾溢箱篋但以童子
篆刻壯夫所慙及忝得魚皆爲棄物尊以浪跡東都
筆作飯囊遂有賦五首詩一百首雜詩賦三十首共
成三篇爾後調授宣州溧水縣尉祿厚官閑飽食終
日仕優則學免擲寸陰公私所爲有集五卷益勵爲
山之志爰標覆簣之名地號中山遂冠其首及罷微
秩從職淮南蒙高侍中專委筆硯軍書幅至竭力抵
當四年用心萬有餘首然洵之汰之十無一二敢比

披沙見寶粗勝毀瓦畫墁遂勒成桂苑集二十卷臣
適當亂離寓食戎幕所謂饘於是粥於是輒以耕爲
筆目仍以王韶之語前事可憑雖則偃僂言歸有慙
鳬雀旣墾旣耨用破情田自惜微勞冀達聖鑒其詩
賦表狀等集二十八卷隨狀奉進謹進

以上桂苑筆耕

上太師侍中狀

伏聞東海之外有三國其名馬韓卞韓辰韓馬韓則
高勾麗卞韓則百濟辰韓則新羅也高勾麗百濟全
盛之時強兵百萬南侵吳越北撓幽燕齊魯爲中國
巨蠹隋皇失馭由於征遼貞觀中我太宗皇帝親統

六師渡海恭行天罰高勾麗畏威請和文皇受降回蹕我武烈大王請以犬馬之誠助定一方之難入唐朝謁自此而始後以高勾麗百濟踵前造惡武烈入朝請爲鄉道至高宗皇帝顯慶五年勅蘇定方統十道強兵樓船萬隻大破百濟乃于其地置扶餘都督府招輯遺氓蒞以漢官以臭味不同屢聞離叛遂徙其人於河南總章元年命英公李勣破高勾麗置安東都督府至儀鳳三年徙其人於河南隴右高勾麗殘孽類聚北依太白山下國號爲渤海開元二十年怨恨天朝將兵掩襲登州殺刺史韋俊于是明皇帝大怒

命內使高品何行成太僕卿金思闌發兵過海攻討
仍就加我王金某爲正太尉持節充甯海軍事雞林
州大都督以冬深雪厚蕃漢苦寒勅命回軍至今三
百餘年一方無事滄海晏然此乃我武烈大王之功
也今某儒門末學海外凡材謬奉表章來朝樂土凡
有誠懇禮合披陳伏見元和十二年本國王子金張
廉風飄至明州下岸浙東某官發送入京中和二年
入朝使金直諒爲叛臣作亂道路不通遂于楚州下
岸邇迤至揚州得知聖駕幸蜀高太尉差都頭張儉
監押送至西川已前事例分明伏乞太師侍中俯

降台恩特賜水陸券牒令所在供給舟船熟食及長
行驢馬草料并差軍將監送至駕前幸甚

東國通鑑